




Gazteek droga eta alkohol gehiegi kontsumitzen dute. Kontseiluaren arabera ARTXIBOKOA

EAEko 21.000 gaztek droga sintetikoak hartzen dituzte

Heroinak adinako arazoak sortzen dituzte droga berriek

Gaur egun diseinuzko drogak modan daude. Droga mota horiek ez dutela ondorio kaltegarriak sortzen oso zabalduta badago ere, jakin dugu hildakoak eragin dituztela dagoeneko. EAEn 21.000 gaztek daukate droga sintetikoak hartzeko ohitura.

Efe / Gasteiz

EAE-KO Droga-menpekotasun Kontseiluak atzo adierazi zuenez, «gazteek alkohol eta droga sintetiko gehiegi kontsumitzen dute. Ohitura horrek 80ko hamarkadan heroinaren kontsumoak sortu zituen pareko arazoak eragin ditu». Kontseiluaren datuen arabera, «EAEn 200.000 lagunek —gehienak 30 urtetik beherakoak— alkohol gehiegi edaten dute asteburuetan, beste 200.000 lagunek droga sintetikoak probatu dituzte inoiz eta 21.000k —ia denak gazteak— droga sintetikoak hartzeko ohitura daukate».

Ramon Jauregi Justizia sailburuak Euskal Autonomi Elkarteko Droga-menpekotasun Kon-

tseiluaren ondorioak azaldu zituen, kontseiluak EAEko droga kontsumoa aztertzei Gasteizen egindako bileran. Jauregi jakinarazi zuenez, «oro har, droga kontsumoak behera egin badu ere, alkohola eta droga sintetikoak hartzen dituen jende asko dago».

Kontseiluaren arabera, oraindik ez dakite zehatz-mehatz droga sintetikoak zer eragin duen osasunean baina ziur daude «larria, arriskutsua eta atzeraezina dela». Droga sintetikoaren kontsumitzaileek erreakzio psikotikoak, depresioak eta beldur ata-keak izaten dituzte. «Droga sintetikoaren eta heroinaren ondorioak ezberdinak dira, baina kasu bietan larriak dira».

Jauregi azpimarratu zuenez,

«ondorioak badiren arren gizarteak gutxietsi egiten ditu. Espainian aurreko jadanik lau lagun hil dira droga sintetikoak hartzeagatik».

Kontseiluak komunikazio estrategia bultzatzeko gomendatu zuen: «Komunikazio plangintza beharrezkoa da droga sintetikoak hartuta ezer gertatzen ez delako mitoa hausteko. Gazteei bizimodu ezberdin baten proposamena ere egin behar zaie; konturatu behar dute ongi pasatzeko ez dagoela gau guztian drogak kontsumitzen aritu behar». Jauregi azaldu zuenez, Espainiako egoera berezia da: «Asteburuetan gau osoan alkohol eta droga gehiegi hartzea, Europa guztian, Espainian bakarrik gertatzen da». X

EAEko 10 ikerketa taldek 20 milioi jasoko dituzte

■ Oliverik ikerkuntzarako transferentziak eskatuko dizkio berriz Madrili

Gorane Agirre / Bilbo

EAEko goi mailako hamar ikerketa taldek urte amaiera bitartean 20 milioi pezeta jasoko dituzte proiektu bana gara dezaten. Jaurlaritzako Hezkuntza Sailak deitutako lehiaketan hautatu dituzte hamar taldeak.

Inazio Oliveri Hezkuntza sailburuak lehiaketaren bi helburu nagusi nabarmendu zituen atzo. «Batetik, EAEn dauden errendimendu altuko ikerketa taldeak zehaztea eta eza-gutzea. Eta bestetik, nazioartean ospea lortu duten ikerketa talde horiei baldintza onenetan lan egiten laguntzea».

Lehiaketara, guztira, 21 talde aurkeztu dira, horietatik 20 Euskal Herriko Unibertsitatekoak (EHU) eta bestea CEITekoak. Talde bakoitzak argitaratutako lan zientifikoak, dituen meritu zientifiko-teknologikoak edota egindako proiektuak aztertutako ostean, epaimahaiak hamar talde aukeratu ditu.


Proiektu bana garatzeko bina milioi pezeta jasoko dituzten

taldeen arduradunak hauek dira: Jose Luis Arrondo (EHU), Jose Maria Asua (EHU), Jose Manuel Barandiaran (EHU), Juan Colmenero (EHU), Pedro Etxenike (EHU), Andoni Ibarra (EHU), Claudio Palomo (EHU), Alfonso Perez-Agote (EHU), Jesus Mari Ugalde (EHU) eta Jose Javier Urkola (CEIT).

Felix Goñi Jaurlaritzako Zientzia Politikarako zuzendariak atzo nabarmendu zuenez, «duela 15 urte ez zegoen hamar hauen maila zientifikoa zuen talde bakar bat ere. Talde hauek Jaurlaritzak egindako politikaren emaitza dira».

Bestalde, Oliverik Gernikako Estatutuaren jasotzen diren ikerkuntzarako konpetentziak lehenbailehen transferitzeko eskatu zuen berriro ere. Konpetentzia horien «balio estrategikoa» azpimarkatu zuen Hezkuntza sailburuak, eta, iragarri zuenez, irailean Esperanza Agirre Hezkuntza ministroarekin izango duen bileran berriro eskatuko du konpetentzia hauek transferitzeko. X

EDURNE KOCH



Errenteriako saihebidia 1998an prest

Jose Julian Irizar Herrilan diputatuak atzo aurkeztu zuen Errenteriako saihebidearen proiektua. Obrak honako hiru enpresek osatutako behin-behineko elkarteari eman dizkiote: Construcciones Sobrino, Excavaciones y Contratas Sarasola eta Construcciones Tecsa-ri. Hiru enpresa horiek 3.326 milioi pezetako eskaintza egin zuten (133 milioi libera inguru), proiektuaren aurrekontua baino 1.108 milioi gutxiago (44 milioi libera). Saihebidearen lanak irailean hasiko dira, uztaila eta abuztua bazter uzteko, eta 1998ko irailean amaitzea espero dute, hasieran aurreikusitakoa baino sei hilabete lehenago.

Lokalen ordutegia murrizteko eta publizitatea kontrolatzeko eskatu dute

ATZOKO kontseiluaren neurri zehatzak proposatu zituzten droga eta alkoholen gehiegizko kontsumoa kopontzeko: «Lokalen ordutegiak murriztea, gazteek alkohola erosteko dituzten erraztasunak aztertzea eta publizitatea kontrolatzea». Jauregi Donostiako Jazaldia jarri zuen adibide moduan.

«Donostiako Jazaldia alkohol etxe batek babesten du, nahiz eta legeak hori debekatuta eduki».

Kontseiluak lau rogei gomendio inguru bidali-ko ditu Parlamentura, 1996-98 Hirurteko Droga-menpekotasun Planarekin batera eztabaidatzeko. Ramon Jauregiaren iritziz,

«EAEn droga-menpekotasunaren aurkako politika ondo doa, badiu baliabideak eta dirua, baita gizartearen inplikazioa ere».

Kontseiluak Euskal Jaurlaritzari eta Espainiako Gobernuari eskatu zien kartzelen konpetentziaren transferentzia negoziatzeko, «pre-soekin politika integrala

egitea posible izan dadin. Presoez ez da inor oroitzen, baina droga arazoekin izugarri sufritzen dute».

Kontseiluak egindako inkesta baten arabera, jendeak ez dauka argi drogen arazoaren etorkizuna. EAEko biztanleen % 47k arazoa bere horretan jarraitzen duela uste dute. X



EIBARKO UDALA IRAGARKIA

"Atletismo lasterkalekua, Unbe kirolgunearen zoruak eta azpiegiturak". Proiektuaren obrak kontratatzei iragarkia.

- Adjudikatzeko era: lehiaketa bidez.
- Lizitazio edo esleipena: 116.083.957, pzta.
- Lana burutzeko epea: 4 hilabete.
- Plikak aurkezteko epea: 96-7-26ra arte (arratsaldeko ordubiak arte).
- Eskaintzak dakartzaten kartazalak zabaltzeko eguna: 96-7-29an, goizeko 9etan, Udal Batzar Aretoan.

Proiektu hori osotzen duten planoak, baldintza-orriak eta gainerantzeko agiriak Udala honetako Hirigintza Sailean azter eta ikus daitezke. Agirion aldakirik nahi izanez gero, DIBUTEC etxera jo behar da, Julian Etxeberria kaleko 17 - behe, 100769 telefonoa duena.

Iragarkia: 96-7-12ko 135. GBOean

Eibarren, 1996ko uztailaren 15ean.
ALKATEAK, INAKI ARRIOLA LOPEZ